

Fiarahabana

Vavaka

“ Ny dia ho amin’ny fahafahana vaovao indray araka ny Ezra 8.15-9.15.”

Hira : 515 :1 Tsara lova ry Jeso ô !

Vakiteny 1 : Ezra 8.15-23

15 Ary novoriko teo amoron’ ny ony mankany Ahava izy, ka nilasy teo hateloana izahay; ary nony nandinika ny olona sy ny mpisorona aho, dia nahita fa tsy nisy taranak’ i Levy teo na dia iray akory aza.16 Ka dia nirahiko Eliezera sy Ariela sy Semaia sy Elnatana sy Jariba sy Elnatana sy Natana sy Zakaria sy Mesolama (samy loholona ireo) ary Joariba sy Elnatana (samy mpampianatra ireo).17 Ary nampitondraiko teny ho any amin’ Ido, loholona any Kasifia, ireo, ka nambarako azy izay teny holazainy amin’ Ido sy ny Netinima rahalahiny any Kasifia, mba ho entiny any aminay izay ho mpanao fanompoam-pivavahana ao an-tranon’ Andriamanitray.18 Ary araka ny soa nataon’ ny tànan’ Andriamanitray taminay no nitondrany olon-kendry anankiray ho any aminay avy tamin’ ny taranak’ i Maly, zanak’ i Levy, zanak’ Isiraely, ary Serebia, sy ny zanany mbamin’ ny rahalahiny, valo ambin’ ny folo lahy,19 ary Hasabia sy Jesaia, avy tamin’ ny taranak’ i Merary, mbamin’ ny rahalahiny ary ny zanany roa-polo lahy;20 ary avy tamin’ ny Netinima, izay notendren’ i Davida sy ny mpanapaka hanompo ny Levita, dia roa-polo amby roan-jato lahy; notononina anarana avokoa ireo.21 Dia niantso andro fifadiankanina aho teo amoron’ ny ony Ahava hampahorianay tena eo anatrehan’ Andriamanitray, mba hangataka Azy hahalavorary ny dianay sy ny an’ ny vady amanjanakay ary ny biby fiompinay rehetra.22 Fa nahamenatra ahy ny hangataka miaramila sy mpitaingin-tsoavaly amin’ ny mpanjaka hiaro anay amin’ ny fahavalonay eny andàlana, satria efa niteny tamin’ ny mpanjaka izahay ka nanao hoe: Ny tànan’ Andriamanitray mahaso izay rehetra mitady Azy; fa ny heriny sy ny fahatezerany kosa mamely izay rehetra mahafoy Azy.23 Ary nifady hanina izahay ka nangataka izany tamin’ Andriamanitray, dia nihaino anay Izy.

Hira : 515 :2 Tsara lalana Jeso ô !

Vavaka

Hahay hamantatra izay endriky ny fahababoana iainantsika amin’izao vaninandro izao.

Hibebaka sy hitodika amin’Andriamanitra isaky ny mahita fahalemena sy fiviliana ary tsy fahatanterahana.

Hahay hikendry ny tanteraka isika fa tsy ho kristiana tapany.

Vakiteny 2 : Ezra 8.24-30

24 Ary nanokana roa ambin' ny folo lahy tamin' ny lohan' ny mpisorona aho, dia Serebia sy Hasabia ary rahalahiny folo lahy ho namany,²⁵ ka nolanjaiko ny volafotsy sy ny volamena horaisiny mbamin' ny fanaka, dia ny fanatitra ho ao an-tranon' Andriamanitray, izay efa naterin' ny mpanjaka sy ireo mpanolotsainy sy ireo mpanapaka ary ny Isiraely rehetra izay vory teo;²⁶ eny, nolanjaiko hatolotra azy ny talenta volafotsy dimam-polo amby enin-jato sy fanaka volafotsy, lanjan' ny talenta zato, ary talenta volamena zato²⁷ sy kapoaka volamena misarona roa-polo, lanjan' ny darika arivo, ary fanaka varahina roa manganohano, tsara toy ny volamena.²⁸ Ary hoy izaho taminy: Hianareo dia masina ho an' i Jehovah, sady masina koa ny fanaka; ary ny volafotsy sy ny volamena dia fanati-tsitrapo ho an' i Jehovah, Andriamanitry ny razanareo.²⁹ Koa miambena hianareo, ka tandremo ireny mandra-pandanianareo azy indray eo anatrehan' ny lohan' ny mpisorona sy ny Levita ary ny lohan' ny fianakaviana amin' ny Isiraely any Jerosalema, dia amin' ny efi-trano ao an-tranon' i Jehovah.³⁰ Dia noraisin' ny mpisorona sy ny Levita izany volafotsy sy volamena ary fanaka voalanja izany mba ho entiny ho any Jerosalema ho ao an-tranon' Andriamanitray.

Hira : 645 :1,4 Jesosy Kapiteninay

Vavaka

Ho an'ny mpitondra mba ho mendrika ny andraikitra napetraka aminy ka sady mahatoky no manana fahatokiana ny hafa.

Isika mba ho mendrika ny fitokisana apetraky ny Tompo amintsika (fiantsoana) sy ny andraikitra apetraky ny olona amintsika.

Ho an'ireo marary, ireo namoy havana.

Vakiteny 3 : Ezra 8.30-36

31 Dia niala teo amin' ny ony Ahava izahay tamin' ny andro faharoa ambin' ny folo tamin' ny volana voalohany mba hankany Jerosalema; ary ny t'anan' Andriamanitray nomba anay, ka Izy no namonjy anay tamin' ny t'anan' ny fahavallo sy ny mpanotrika teny an-dàlana.³² Ary nony tonga tany Jerosalema izahay, dia nijanona hateloana aloha (Neh.2.11).³³ Ary tamin' ny andro fahefatra no nandanjana ny volafotsy sy ny volamena ary ny fanaka ho eo an-t'anan' i Meremota, zanak' i Orià mpisorona, tao an-tranon' Andriamanitray; ary teo aminy koa Eleazara, zanak' i Finehasa; ary teo amin' izy roa lahy koa Jozabada, zanak' i Jesoa, sy Noadia, zanak' i Binoy; Levita izy roa lahy ireo;³⁴ an-isany sy an-danjany izany rehetra izany; ary voasoratra tamin' izany andro izany ny lanjany rehetra.³⁵ Ary ny olona izay niverina avy tamin' ny fahababoana dia nanatitra fanatitra odorana ho an' Andriamanitry ny Isiraely, dia vantotr' ombilahy roa ambin' ny folo ho an' ny Isiraely rehetra sy ondrilahy enina amby sivifolo sy zanak' ondry fito amby fito-polo ary osilahy roa ambin' ny folo ho fanatitra noho ny ota: fanatitra odorana ho an' i Jehovah ireo rehetra ireo.³⁶ Ary ny didin' ny mpanjaka dia natolony tamin' ny solo-mpanjaka sy ny mpanapaka tamin' ny etỳ an-dafin' ny ony etỳ; ary izy ireo nampandroso ny olona sy ny tranon' Andriamanitra.

Hira : 515 :3 Tsara vatsy ry Jeso ô !

Vavaka

Mba hahay hanome ho an'ny Tompo ny kristiana fa tsy variana mangataka fotsiny.

Ho an'ny sahirana.

Vakiteny 4 : Ezra 9.1-15

1 Ary rehefa vita izany rehetra izany, dia nanatona ahy ny mpanapaka ka nanao hoe: Ny Isiraely sy ny mpisorona ary ny Levita dia tsy mbola miavaka amin' ny olona tompon-tany, fa manao araka ny fahavetavetan' ny Kananita sy ny Hetita sy ny Perizita sy ny Jebosita sy ny Amonita sy ny Moabita sy ny Egyptiana ary ny Amorita ihany izy.² Fa efa naka tamin' ny zanakavavin' ireo ho vadiny sy ho vadin' ny zanani-lahy izy, ka efa miharoharo amin' ny olona tompon-tany ny taranaka masina; eny, ny lehibe sy ny mpanapaka aza no nitari-dalana tamin' izany fahadisoana izany.³ Ary nony nandre izany zavatra izany aho, dia nandriatra ny lambako sy ny akanjoko sady nandrompotra ny volon-dohako sy ny somotro, dia nipetraka tahaka ilay torana iny aho.⁴ Dia nivory teo amiko izay rehetra nangovitra noho ny tenin' Andriamanitry ny Isiraely ny amin' ny fahadisoan' ny olona izay efa niverina avy tamin' ny fahababoana; ary izaho mbola nipetraka tahaka ilay torana iny ihany hatramin' ny fotoan' ny fanatitra hariva.⁵ Ary nony tamin' ny fotoan' ny fanatitra hariva dia nody ny aiko, ka nitsangana aho, sady nandriatra ny lambako sy ny akanjoko indray, dia nandohalika nanandratra ny tanako ho amin' i Jehovah Andriamanitro aho ⁶ ka nanao hoe: Andriamanitro ô, menatra sy mangaihay aho, raha miandrandra aminao, ry Andriamanitro ô; fa efa nihamaro mihoatra ny lohanay ny helokay, ary ny fahotanay dia lehibe manakatra ny lanitra;⁷ fa hatramin' ny andron' ny razanay ka mandraka andro-any dia lehibe ny helokay; ary ny helokay no nanolorana anay sy ny mpanjakanay ary ny mpisoronay ho eo an-tànan' ny mpanjakan' ny tany hafa, hovanoin-tsabatra sy ho babo sy ho voaroba ary hangaihay tahaka ny amin' izao anio izao.⁸ Koa ankehitriny vao niseho vetivety ny fahasovana avy tamin' i Jehovah Andriamanitray tamin' ny namelany anay ho nisy sisa afaka sy tamin' ny nanomezany anay fihantonana eo amin' ny fitoerany masina, mba hohazavain' Andriamanitray ny masonay ka homena famelombelomana kely amin' ny fahandevozanay izahay.⁹ Fa andevo izahay, nefa tsy nafoin' Andriamanitray, na dia tamin' ny fahandevozanay aza, fa nataony nahazo famindrampo eto imason' ireo mpanjakan' i Persia ihany hanomezany anay famelombelomana, hanangananay ny tranon' Andriamanitray sy hanamboaranay ny rava eo, ary hanomezany anay mânda any Joda sy Jerosalema.¹⁰ Koa ankehitriny, ry Andriamanitray ô, ahoana no holazainay amin' izany? Fa efa nahafoy ny didinao izahay,¹¹ dia ilay nampilazainao ny mpaminany mpanomponao hoe: Ny tany izay efa hidiranareo holovana dia tany maloto noho ny fahalotoan' ny tompon-tany sy ny fahavetavetany, izay efa nataony manenika azy noho ny fahalotoany;¹² koa aza manome ny zanakareo-vavy ho vadin' ny zanani-lahy, na maka ny zanani-vavy ho vadin' ny zanakareo-lahy; aza mitady izay hiadanany na izay hahasoa azy mandrakizay, mba hahery hianareo ka hihinana ny soa avy amin' ny tany, dia hamela izany ho lovan' ny taranakareo mandrakizay.¹³ Ary na dia efa nanjo anay aza

izany rehetra izany noho ny asa ratsinay sy ny fahadisoanay betsaka, dia tsy nampijaly anay araka ny helokay Hianao Andriamanitray, fa efa namela anay ho nisy sisa afaka toy izao ihany,¹⁴ fa raha handika ny didinao indray izahay ka hifanambady amin' ireny olom-betaveta ireny, moa tsy ho tezitra aminay mandra-pahalany ritranay va Hianao, ka tsy hisy sisa afaka akory?¹⁵ Jehovah, Andriamanitry ny Isiraely ô, marina Hianao, fa izahay no hany sisa afaka tahaka ny amin' izao anio izao; indreto izahay eto anatrehanao amin' ny fahadisoanay, fa noho izany dia tsy mahajanona eto anatrehanao izahay.

Hira : 439 :1,3 Mba taomy aho e

Vavaka

Vavaka malalaka faranana amin'ny Vavaka nampianarin'ny Tompo.

FEHINY Fil.4.6-9

Aza manahy na inona na inona; fa aoka ny fivavahana sy ny fifonana mbamin' ny fisaorana no ho entinareo manambara ny fangatahanareo amin' Andriamanitra amin' ny zavatra rehetra. Ary ny fiadanan' Andriamanitra, izay mihoatra noho ny fahalalana rehetra, hiaro ny fonareo sy ny hevitrareo ao amin' i Kristy Jesosy. Farany, ry rahalahy, na inona na inona marina, na inona na inona manan-kaja, na inona na inona mahitsy, na inona na inona madio, na inona na inona maha-te-ho-tia, na inona na inona tsara laza, raha misy hatsaram-panahy, ary raha misy dera, dia hevero izany. Ataovy izay efa nianaranareo sy efa noraisinareo ary efa renareo sy efa hitanareo; ary ho aminareo ny Andriamanitry ny fiadanana.

Hira : 627 : 1,3 Vimbino tsara izahay

Tsodrano Joda 24-25

Ary ho an' izay maharo anareo mba tsy ho tafintohina, ary hametraka anareo tsy hanantsiny eo anoloan' ny voninahiny amin' ny firavoravoana, ho an' Andriamanitra tokana, Mpamonjy antsika, amin' ny alalan' i Jesosy Kristy Tompontosika anie, ny voninahitra sy ny fahalehibiazana, ny fanjakana sy ny fahefana hatramin' ny taloha indrindra sy ankehitriny ary mandrakizay. Amena.